



## **Protocol**

Dalla 14. radunanza generala dil Provediment d`aua Medel/Lucmagn, gievia ils 24 da mars 2022 allas 20.00 uras ell`aula dalla scoletta a Curaglia

### **Tractandas :**

1. Beinvegni
2. Elecziun d'in dumbravusch
3. Approbaziun dil protocol dils 25-03-2021
4. Presentaziun ed approbaziun dil quen 2021
5. Rapport dil president
6. Program da laver 2022
7. Damonda da credit
  - a) Via cantunala Fuorns frs. 5'000.00
  - b) Via Prinzipala Curaglia frs. 25'000.00
8. Fixar las taxas d`aua per 2022
9. Elecziuns/ reelecziuns
  - a) Actuar
  - b) 1 revisur da quen
10. Nominaziun da candidats per las elecziuns communalas
11. Varia

**Perstgisas:** Claudio Simonet president communal  
Rico Bearth survigilader d`aua aquaduct Fuorns

## **1. Beinvegni**

Punctualmein beneventa il president Alfons Venzin ils convischins alla 14avla radunanza generala dil Provediment d'aua Medel/Lucmagn ed engrazia a tuts per lur preschientscha.

El menziunescha che l'invitaziun e la publicaziun dalla giesta da tractandas seigi succedida conform als statuts.

Sin la damonda per amplificar ni midar la giesta da tractandas ha ei dau neginas menziuns.

Sinaquei mida il president sez sut la tractanda 7. Damonda da credit per la sanaziun dalla Via Prinzipala dalla summa frs. 25'000.00 sin niev frs. 90'000.00

## **2. Elecziun d'in dumbravusch**

Sco dumbravusch vegn Toni Venzin proponius ed era elegius.

Presents ensemens cun la suprastonza ein 12 vischins.

## **3. Approbaziun dil protocol dils 25-03-2021**

Il president damonda sche zatgi dils presents hagi ina damonda tier il protocol dalla 13avla radunanza generala dils 25-03-2021 ch`ei publicaus sin la pagina d'internet [www.auamedel.ch](http://www.auamedel.ch)

Demai che negin ei sannunziaus ha il president fatg la damonda per approbar il protocol dalla davosa radunanza generala sco el ei publicaus.

Il protocol vegn approbaus unanimamein.

Il president engrazia agl actuar per l`ediziun.

## **4. Presentaziun ed approbaziun dil quen 2021**

Il president dat il plaid al cassier Pauli Pally per presentar il quen 2021, il qual ei distribuius en fuorma d'in script sin pupi e repartius a mintga present. Il cassier declara detagliadamein las entradas ed expensas, las qualas sedifferenzieschan agl onn vargau.

Igl total d'entradas munta igl onn 2021 à frs. 109'109.05

Igl alzament dallas entradas viers igl onn vargau ei la consequenza dallas novas taxas d'aua ch`ein vegnididas approbadas alla radunanza generala 2021.

Las expensas resultan la summa da frs. 93'884.10 ch`ei per frs. 1757.90 pli bassa ch`igl onn vargau. Aschia muossa il quen in surpli d'entradas da frs. 15'224.95

Igl agen capital munta per ils 31-12-2021 a frs. 330'185.25

Il quen 2021 dil Provediment d'aua Medel/ Lucmagn ei presentaus sin la pagina d'internet [www.auamedel.ch](http://www.auamedel.ch)

Il cassier declara che cun ina svilta da sur frs. 100'000.00 ei il Provediment d'aua obligaus da pagar taglia da plivaleta egl avegnir.

Sin igl appel per damondas pertucont il quen annual ei negin s'annunziaus.

Il cassier engrazia aunc a ses consuprastonts ed als revisurs da quen per lur sustegn.

Il president engrazia al cassier per il quen e dat il plaid als revisurs.

Il revisur Hanspeter Bundi pren il plaid ed engrazia al Pauli. El fa in grond cumpliment per la buna lavur cumpetenta dil cassier. Els hagien controllau il quen miniziusamein e constatau che tut ei vegniu menau concenzius e correct. Aschia fa il revisur la tscharcha per approbar il quen sco il cassier ha gest presentau.

Il quen annual 2021 vegn approbaus unanimamein dils presents.

Il president engrazia al cassier per sia buna lavur.

## **5. Rapport dil president**

Sco mintg`onn dat il president in cuort rapport dil passau egl onn vargau.

Cun ils emprems plaids menziunescha il president che las sfidas e pretensiuns per il Provediment d`aua creschan onn per onn. Las leschas e perscripziuns vegnan adina pli strengas e pretendan aschia permanentas remeduras ed era novas investiziuns vid l`infrastructura.

Igl onn 2021 ei stau per il Provediment d`aua in onn plitost ruasseivel cun aua da beiber en abundonza sur igl entir onn ora.

Igl onn 2021 ha igl uffezi da valetaziun d`immobilias dil cantun Grischun valetau da niev tut nos objects. Era ils quals ch`eran aunc buca valetai. Mo ils objects che valan dapli che la summa da frs. 20'000.00 vegnan segirai dalla segirada da baghetgs dil cantun Grischun (GVG)

Il zercladur 2021 ha igl uffeci da segirtad da victualias e per la sanadad d`animals fatg ina inspecziun da nies Provediment d`aua. Tier quella inspecziun ei vegniu controllau rigurusamein mintga stiva d`aua, ventil d`aria ed ils reservuars. Tenor lur rapport han els confirmau a nus che nossa infrastructura seigi en in fetg bien stan. Tuttina dat ei aunc da far entginas remaduras sco per exempl sifonar il reservuar Runs, sifonar entginas stivas d`aua e remplazzar ils filters d`aria en las stivas d`aua.

Il niev project per il provediment d`aua Val Parada ei inoltraus allas instanzas cantunalas. Dapi il zercladur 2021 mesirein nus il quantum d`aua ellas fontaunas dil Provediment d`aua dad Acla. Quella mesiraziun cuozza tochen il zercladur 2022. Semuossa che las fontaunas furneschan avunda aua per ils habitants da Fuorns ed Acla sur igl entir onn ora, vegn il niev project elaboraus vinavon tochen tier la damonda da baghegiar.

Igl onn 2021 havein fatg entginas emprovas per la qualitat dall`aua. Las emprovas microbiologicas e chemicas han demussau che l`aua ei da fetg buna qualitat e corrispunda allas pretensiuns conform alla lescha. Sulettamein l`aua dil provediment da Fuorns ha la controlla microbiologica mussau in quantum minimal da bacterias. Ei ha denton mai regiu in prighel da sanadad per ils

consuments dall'aua. Cheu ha il Provediment d'aua priu mesiras per megliurar quella situaziun.

La qualitad da noss'aua ei publicada sin la pagina d'internet [www.auamedel.ch](http://www.auamedel.ch). Iis 7 d'avrel ei succediu ina ruttadira dalla lingia principala dil reservuar Runs a Curaglia. Quei en connex cun las lavurs vid la sanaziun dalla via da Soliva.

Ils 17 da zercladur havein pinau ina ruttadira d'ina lingia a Zunins.

Plinavon ein succedidas pliras ruttadiras vid lingias privatas.

Las seivs per las zonas da schurmetg entuorn las fontaunas si l'alp Pazzola e l'alp Puzzetta han las alps erregiu. La seiv si l'alp Puzzetta basegna megliur igl onn vegnend. Prinzipalmein sto quella vegnid'erregida avon che cargar l'alp cun animals.

Ils 14 d'october ha giu liug ina uatga a Cardaneuls cun igl inschignier Ursin Venzin. Cheu havein mirau sch'igl ei pusseivel da tschaffar la fontauna ch'ei donnegiada gia entgins onns, e sche quei augmenta insumma il quantum d'aua durond igl unviern. Il pareri leutier maunca aunc.

Las restonzas dalla seiv da schurmetg sils Neidis ei vegnida allontanada. Quella haveva negina funcziun pli.

La suprastonza ha teniu igl onn 2021 sis sedutas. Ina da quellas ensemes cun ils survigiladers d'aua. Ina seduta ha giu liug ensemes cun la suprastonza dil Provediment d'aua dad Acla. Cheu havein discussiunau co la collaboraziun succeda en cass ch'il Provediment d'aua Fuorns tschaffa l'aua dalla Val Parada. Da principi van els d'accord cun ina fusiu da quels dus Provediments. Sche nus menein vinavon quei niev project, daventa il vitg dad Acla ina part dil Provediment d'aua Medel/ Lucmagn.

Sco conclusiun engrazia il president grondamein a ses consuprastont+s sco era al gerau Gabriel Venzin per la buna collaboraziun. Medemamein engrazia el era als survigiladers d'aua per lur engaschi. Els fan fetg buna lavur en favur dil Provediment d'aua.

## 6. Program da lavur 2022

Il progam da lavur per igl onn 2022 vegn a vegnir ualiti vasts. La vischernaunca entscheiva cun la sanaziun dallas vias el vitg da Curaglia ed il cantun sanescha la via da Fuorns en duas etappas. En omisduas vias vegn aschia sanau las lingias d'aua.

A Curaglia vegn la Via Prinzipala sanada. Cheu vegn en quei connex remplazzau tut l'infrastructura d'aua el trassé dalla via e contuorn. Detagls leutier sut tractanda 7 Damonda da credit.

La via da Fuorns vegn sanada sil tschancun naven dalla Via Lucmagn tochen tier la casa da Clau Venzin. Cheu ei il Provediment involvaus cun duas traversadas dalla lingia d'aua.

A Curaglia sper la punt dalla Val Plattas ed a Platta era sper la punt da Drual basegna ei da remplazzar dus sclusaduirs defects.

Las seivs da schurmetg S1 a Tegia Nova e Puzzetta veggan erregidas dallas alps. Il Provediment vegn a controllar schebein quei succeda sco previu.

Per il niev project Val Parada vegn terminau las mesiraziuns d`aua il zercladur. Semuossan quellas positivas vegn il project concret elavuraus en detagl ed inoltrau la damonda da baghegiar. Plinavon stuein nus allura segirar la finanziaziun da quei project. Cheu sperein nus sin sostegn finanzial dalla confederaziun, cantun e vischernaunca.

## 7. Damonda da credit

|                                   |                       |
|-----------------------------------|-----------------------|
| <b>a) Via cantunala Fuorns</b>    | <b>frs. 5'000.00</b>  |
| <b>b) Via Prinzipala Curaglia</b> | <b>frs. 90'000.00</b> |

Sco gia menziunau vegn la via tier il vitg da Fuorns sanada en duas etappas durond ils proxims dus onns. Per igl onn 2022 pertucca la sanaziun dalla via il Provediment d`aua cun duas traversadas dalla lingia d`aua. Quels cuosts ein calculai digl inschignier da quei project cun la summa da frs. 5'000.00 Era tier la sanaziun dalla Via Prinzipala a Curaglia ei vegniu surdau al Provediment d`aua ina calculaziun dils cuosts. Quella muossa la summa da frs. 90'000.00 Quella summa ha fatg surstar bravamein la suprastanza demai che quels cuosts eran calculai oriundamein bia pli bass. Ei fa denton senn da midar las lingias che sesanflan sut la via en cumbinaziun cun la sanaziun da quella. Era las lingias che continueschan en vischinanza dalla via ed ils hydrants veggan remplazai en quei connex.

Per quella investiziun fa la suprastanza ina damonda per sostegn finanzial alla vischernaunca.

Duri Lutz fa la damonda co che quei seigi cun ils cuosts dallas lingias privatas. Ils sclusaduirs e las lingias tier ils objects privats tuccan ils cuosts a mintga possesur digl object. Quels veggai confrontai cun ina summa da ca. frs. 1500.00 per object ed els ein era gia informai en caussa.

Toni Venzin damonda co quei ei cun la lingia electrica dalla tiara che vegneva pli baul ligiada vid la lingia d`aua. Oz ei quei buca pli conform alla lescha.

Quella risposta sin la damonda tecnica sa la suprastanza buca dar. En mintga cass vegg quei schligiau conform alla lescha actuala.

Il president fa als presents la damonda per omisdus credits en globo.

A quella damonda vegn dau suatientscha unanimamein.

## 8. Fixar las taxas per 2022

La suprastanza fa la proposta da schar las taxas sco igl onn vargau. Avon in onn ein quellas gia veggidas alzadas.

Demai che negin giavischa il plaid fa il president la damonda per laschar las taxas sco igl onn vargau.

Quella proposta vegn sustenida unanimamein dils presents.

## **9. Elecziuns/ reelecziuns**

Conform als statuts sauda l` elecziun/ reelecziun digl actuar Otmar Venzin ed il revisur da quen Hanspeter Bundi

Negin ha demissiunau siu post aschia ch`els stattan a disposiziun per ina suandonta perioda d`uffeci.

Sin la damonda per outras propostas negin dils presents che giavischon il plaid. Aschia fa il president la damonda da reelegier ensembe igl actuar ed il revisur per ils proxims 3 onns.

Els vegnan reelegi unanimamein.

Actuar:                   Otmar Venzin

Revisur da quen: Hanspeter Bundi

## **10. Nominaziun da candidats per las elecziuns communalas**

Uonn ils 15 da matg ha liug la elecziun supplementara d`in gerau.

Ord quei motiv supplicescha il president per la discussiun pertuccond la nominaziun d`in candidat sco gerau communal. Negin dils presents giavischon il plaid.

## **11. Varia**

Sut varia dat il president il plaid als presents per lur damondas ni giavischs.

Duri Lutz giavischon il plaid e fa la damonda schebein ei seigi vegniu patertgau vid la lingia d`aua nova per Fuorns e gia montau quella per la traversada dalla Via Lucmagn ch`ei vegnida sanada igl onn vargau.

Il president sincerescha che seigi vegniu satrau in bischel vit sut la via sanada cun igl intent da menar leu atras la lingia nova d`aua per Fuorns. Sche quei bischel vegni lu la finala era duvraus per quei intent ei aunc buca segir.

Il gerau Gabriel Venzin porta ils buns auguris dalla suprastanza da vischernaunca ed engrazia en num da quella per la buna lavur prestada en favur dil Provediment d`aua Medel/ Lucmagn.

Il president envida aunc il presents ad in pign sitg suenter la seduta.

Sinquei siara il president la radunanza cun engraziar a tuts presents per lur preschientscha e giavischon in bien retuorn a casa.

Curaglia, ils 2 d`avrel 2022

Igl actuar :

Otmar Venzin